



TAPAK 8

Indonesia menoknok lendong nung nisung 35 asü, aika yiru

TAPAK 7

PM Modi-i aluyimertem longkak aitba agi laakdaktsüner

VOL. XVIII NO. 91 (ADOK 92) DIMAPUR

KÜPTOKNÜ (SATURDAY) AENJETI (JANUARY) 16, 2021

₹ 5.00

India nung mezüngbuba machine pistol yanglutetogo



New Delhi, January 15 (Agencies): Defence Research and Development Organisation (DRDO) aser Indian Army yaritepa India nung mezüngbuba 9 mm machine pistol ka yanglutetogo, ta Defence Ministry-i metetdaktsü.

Mhow nung aliba Army indang infantry school aser Pune nung aliba Development Establishment (ARDE) ajanga iba pistol ya yaritepa yanglu.

Ita pezü tsüingda nung pistol yanglutetogo ta Defence Ministry-i metetdaktsü.

Armed forces atema iba pistol ya kanga tajanzük lir aser telungpur o kiralongrartem anema mission balala inyakdang amshitetsü, ta parnokisa ashi.

"Iba machine pistol ka yangluba nung Rs 50,000 majung endoktsü aser tanga linüktemia alizüktsü akok" ta Defence Ministry-isa metetdaktsü.

Mkg nung IPPI agütsüba anogo thinener

Dimapur, January 15 (TYO): Mokokchung district nung January 17, 2021 nü Intensive Pulse polio Immunization (IPPI) agütsütsü aliba January 31, 2021 nung ang agütsütsü thinener, ta Chief Medical Officer

Mokokchung-i tanü metetdaktsüogo.

Iba ya Press Information Bureau Government of India HFW/NID-i osang agütsüba nung ajemdaker melenshir, ta CMO Mokokchung-i ashi.

Gurugram police-i Naga nunger ka dena gari auyar telok ka apu

Gurugram, January 15 (Agencies): Gurugram Police-i jenjang tasak indang garitem auyaa ayoker nisung asem puogo.

Par asem rongnung nisung anati tesüiba küm ana tsüingda gari noklang ka tema auya aser Nagaland nung yokdokogo. Auyaba garitem agizüker aser tasa atongsangji Nagaland nungi puogo.

Par asem ket nungi unlock device tab ka, fake number plates 2, sockets 3, plate instrument 1, amulater device 1 aser master key 1 puogo.

Parnok ket nung lia apuba unlock device tab ji Rs 2 lakh agi alir aser gari mashii ka lapokteter. Police-i Nagaland nung Fortuner gari ana ngutetogo.

Nisung ana jagi Delhi-NCR nungi Innova aser Fortuner garitem auya aser iba sülen Nagaland nung alisang dang gari ka nung sen lakh 5 agi yokdok.

Taoba küm ana tenati gari 100 tema auya yokdokba nangzükogo.

Police-i apurtemji UP kübok Pyau Majra nunger Ankit, Ghaziabad nunger Jalal aser Nagaland kübok Dimapur nungi Kikheto nungertem ta jangjaogo.

Gurugram Police-i taoba ita Hisar nungi Ankit aser Ghaziabad nungi Jalal na apu. Iba sülen tena

dang asüingdangya asüandang Kikheto tenüing jungkai adoka metetdaktsü.

Par asemprong Gurugram nung okadak kati anir oa ken o benok aser idangji nisung ana anogo 8 nü police ket nung ayutsü aser Nagaland nungi Kikheto judicial custody nung ayutsü temelaba agütsü.

"Parnoki device tab amshia gari auyaba sülen anogo ishika miima ayu. Iba sülen Nagaland nung Kikheto den osang agitep aser pai taila kulikakettem aser number plates yok. Itemji anguba sülen tenati gari lenmang ajanga Nagaland-i garitemji bener ao. Kikheto-i tena nem gari ka atema Rs 5 lakh agütsü aser pai Rs 10 nungi Rs 20 lakh agi yokdok" ta ACP, Crime, Preet Pal Singh Sangwan-i osangbener dang ashi.

Iba maparen nung tongti süa tai tongloksüasang Kikheto-i Gurugram aser temeket nung gari 50 tema yokdokba nangzükogo. Garitemji Gurugram, Delhi, Faridabad, Rajasthan aser Haryana nungi auyaba liasü.

"Parnoki garitem auyaba sülen engine aser chassis numbers taila yanglushi. Parnoki gari indang jenjang nungi 48% agi tajemba agi garitemji yokdok. Onoki maneni asüingdangya südar" ta ACP Sangwan-isa ashi.

COVID-19 Nagaland: Nisung 12,039 nungi 11,707 taneptsü nguogo

Kohima, January 15 (TYO): Hokolbarnü Nagaland nung COVID-19 agi shiranger nisung 22 taneptsü nguogo aser nisung 4 dak putet.

"Tanü nisung 4 dak COVID-19 aliba putetogo. Parnokji Kohima aser Dimapur nung anana lir. Külen, nisung 22 taneptsü angu. Parnokji Dimapur nungi 21 aser Mon nungi 1 lir" ta Health & Family Welfare Minister, S Pangnyu Phom-i ashi.

Nisung 12,039 rongnungi parnok 11,707 taneptsü nguogo, ta Minister Pangnyu-isa ashi.

"Dimapur district nung COVID-19 puteta alir nisung ana asüiba züingsema tasür ajak agi 88 kümogo. Tasürtem rongnung parnok 78 coronavirus ajanga aser 10 tanga timtem

ajanga asü," ta Health & Family Welfare Director, Dr Denis Hangsing-i metetdaktsü.

Nisung 140 tashi tanga state temi ogo, ta paisa shisem.

District balala nung COVID-19 putetba: Dimapur (6,451), Kohima (3,761), Mon (605), Peren (504), Tuensang (244), Mokokchung (186), Zunheboto (142), Phek (47), Kiphire (41), Wokha (39) aser Longleng (19).

Nisung 12,039 rongnung Traced Contacts 4,959, armed forces personnel 4,659, tanga state tem nungi arur 1,849 aser Frontline Workers 572 lir, ta Dr Hangsing-i ashi.

District balala nung tang anepalurtem: Dimapur (47), Kohima (46), Mokokchung (7), Peren (2), Mon (1) aser Longleng (1).

"Tang anepalurtem rongnung nisung 10 dak shirangba yimya terara lir, 2 kanga shiranga oxygen agidar aser 2 ICU nung lir. Nisung 90 dakbo shirangba yimya kecha mali" ta Dr Hangsing-isa metetdaktsü.

Taneptsü angurtem: Dimapur (6,271), Kohima (3,658), Mon (593), Peren (499), Tuensang (243), Mokokchung (170), Zunheboto (139), Phek (50), Kiphire (40), Wokha (35) aser Longleng (9).

"Nagaland nung COVID-19 alitsü akok ta temolung melemi bilemba sample 1,22,708 tendangogo. RT-PCR ajanga sample 72,804, TrueNat ajanga sample 36,903 aser Rapid Antigen Test ajanga sample 13,001 tendang" ta Dr Hangsing-isa ashi.

Nagaland nung health workers 12,000 nem Covid vaccine agütsütsü

Dimapur, January 15 (Agencies): Nagaland nung health care workers nisung 12,000 shi ka nem COVID-19 vaccine agütsütsü.

Brihostibar anüingdang Nagaland-i Covishield mezüngbuba shilem tonga aruogo. Dimapur airport nung Dimapur chief medical officer Dr Mereninla Senlem aser ketdangsürtemi 26,500 doses agizüka liasü.

Directorate of health &

family welfare, Kohima nung Principal secretary, H&FW, Amardeep Singh Bhatia-i COVID-19 vaccines sayatsü.

Honibarnü Chief Minister Neiphiu Rio-i vaccination drive tenzükja tesem 9-i vaccine doses bener yoktsü ta Bhatia-i ashi.

"Nagaland kübok district ajak nung COVID-19 vaccination atema maparen ajak renemogo. India sorkari latettsüba ama vaccine

agütsütsüba tesemtem kanga dang kümdanga shimogo," ta Bhatia-i ashi.

Dimapur district hospital nung vaccine agütsüba mapa inyaktsü aser mezüngbuba shilem nung nisung 100 nem agütsütsü, ta Dimapur CMO Dr Mereninla Senlem-i ashi.

"Nagaland nung vaccine ayutsü nüingdakba ama 2 nungi 8 degree Celsius indang storage facilities tajung lir" ta laisa ashi.

Dzükou morok mi nung yariteper nem tenüngsang agütsü

Dimapur, January 15 (TYO): January 15, 2021 nü Dzükou Valley, Kohima nung morok mi anema rarar nem tenüngsang agütsüba sentong ka agiogo.

Iba sentong nung Home Commissioner & CEO, NSDMA Nagaland, Abhijit Sinha IAS, Urban Development & Municipal Affairs Advisor, Dr. Neikiesalie Nicky Kire aser Advisor to CM Nagaland, Technical Education & Election, Medo Yhokha nungertem aden.

Home Commissioner, Abhijit Sinha IAS-i Dzükou Valley, Kohima nung morok mi lendong anema raraba mapa nung yariteper ajak dang pelaba metetdaktsü.

Telok balalai iba morok mi anema takok ngua inyakogo aser maneni tarutsü nunga yamaji inyaktsü ayongzüker, ta Abhijit-i ashi.

Advisor Dr. Nicky-ia telok aser department ajak dang pelaba metetdaktsü.

Dzükou morok mi azüoktetba atema shilem agir ajak dang pelar aser tarutsü nunga iba tesem wazüka ayutsü, ta Advisor, Medo Yhokha-i ashi.

Iba sentong nung mendenji Kohima Deputy Commissioner, Mohammed Ali Shihab A liasü aser paia Dzükou morok mi nung shilem agiba departments aser agencies ajak dang pelaba metetdaktsü.

Home Commissioner, Abhijit Sinha IAS den külemi Advisor Dr. Nicky Kire aser Advisor Medo Yhokha nungeri Certificate of Appreciation lema agütsü.

Tanü sempet agizükertemji Indian Air Force, DEF Kohima, Home Guards & Civil Defence,

SDRF, NDRE, 4th NAP, Assam Rifles, Police Wireless, 1st Assam Rifles, 164 TA, Medical Department, DPRO, DDMA, Fire & Emergency Services, SAPO, SAYO, Forest Department aser PWD R&B (South Division) liasü.

Sentong nungsa ADC Kohima, Lithrongla Tongpi Rutsa-i Dzükou morok mi indang osang tejangja metetdaktsü.

December 29, 2020 nü mi lendong adokba anogo nungi tenzüker January 11, 2021 nü mi remsepba tashi inyakba osangtem Lithrongla Tongpi-i metetdaktsü.

Iba sentong ya Nagaland State Disaster Management Authority (NSDMA) aser District Disaster Management Authority Kohima (DDMA) ajanga ayongzüka agi.

PMKK Mkg Centre-i PMKVY 3.0 tenzükba sentong nung shilem agi



India nung PMKVY 3.0 tenzükba sentong PMKK Mokochung Centre nunga online ajanga shilem agia reprangba mapang tangokba noksa nung angur. Mokochung, January 15, 2021.

Mokochung, Aenjeti Jan 15 (TYO): India lima tesem balala nung Pradhan Mantri Kaushal Vikas Yojana asembubaren tenzükba sentong takok ngua agiogo. PMKVY 3.0 tenzükba sentongji centre lapoka aliba tesem ajak nung online ajanga agia liasü. Aji oda, PMKK Mokochung Centre (Empower Pragati) nunga online ajanga shilem agia denogo.

PMKVY 3.0 ya Government of India indang flagship skilling scheme ka lir aser iba ya Ministry of Skill Development & Entrepreneurship (GoI) ajanga ketdang süa agir aser iba 3.0 phase yabo tanü alima tensa den apet mapa inyaksü ashi metet (skills) balaka nung rangloker agitsü terenemshiba tulu lir.

PMKVY mapatong kübok nisung lakh aika nem angati sorkari rongsen jenti intoka nungdakbapur nem training balala agütsür. Skill India Mission ya 2015 küm India Prime Minister Narendra Modi ajanga India ajunga nung tenzüksü. Iba mapatong ajanga alima nung India ya ashimetet (skill) tsütsü tongtibang linük ka kümdaktsütsü nükjidong lir.

Tanü India lima PMKVY 3.0 tenzükba sentong nung sensaksemsü asoshi centre 75 shimtetba rongnung Mokochung centre-a densema liasü. Tangji Mokochung Centre nung ya item training 3

ya agütsür; Customer relationship management (CRM) Business process outsourcing (BPO), Make-up Artist aser Room Attendant. Koba training agidir agiaka, Basic Computer Application den Soft Skill densema sayur.

Tang tashi nung Mokochung Centre nungi nisung 300 tema nem training balala agütsüogo aser item rongnung mapa angurtemji nisung 160-170 shi lir. Training angati agütsüba dang masü training temer külenji private sector nung mapa inyaksü lenmang bushitsür. Nagaland nungi ibala training agir alirtemji India lima tesem balala nung kanga sapur, kechiyong asenok dak jembishinüba aser wainshin sempet tajung keta, ta Centre Manager, Imtirenba-i osangbener den jembidang metetdaksü.

Jangratemtsü kaji PMKVY mapatong kübok tetsür tanur nem maoangka kanga agütsür. Tang PMKVY 3.0 January-

March batch atema Mokochung centre nem nisung 159 training agitsü melaogo aser tesayura talila shimoktsü asoshia temelaba arua lir. Shitakba agibo batch ka nung nisung 120 dang melar, saka Mokochung nem talila lemsüktsüba asoshi Centre Manager-isa pelaba lemsatet. "Iba training ya angati dang agütsür, anungji, iba maangkaji raktepa agitsüla", ta paisa ayongzüik.

Tanü joko alima ya balaka kümogo. College zünger degree anguba aser azüng züluba metetba kisüngji teperi masü. Taküm liyonga aotsü atemabo azüng zülü metetba denji ashimetet (skill) karbo angazüksü nungdaker. Sorkar mapa ajakibo mangutsü aser private sector nung inyaksü atemajia ashimetetba melira mapa mangutsü, ta Centre Manager-isa ashi. "Na skill dang lira pei sasa meranga inyaker tepok sünga litettsü lenmang aika lapoktsü," ta paisa shisem.

Tuensang nung Electoral Roll adoka lemogo

Dimapur, Aenjeti/January 15 (TYO): Deputy Commissioner Conference Hall, Tuensang nung Ajit Kumar Verma IAS, ADC & Electoral Registration Officer, Tuensang mendenpuba sür Electoral Roll final publication sentong ka January 15, 2021 nü agia liasü.

Iba final electoral roll ya Tuensang district kübok political

party ajunga nem lema agüja liasü.

Iba final publication nung 51 A/C Noksen, 52 A/C Longkhim-Chari, 53 A/CD Tuensang sadar-1, 54 A/C Tuensang Sadar-II aser 58 A/C Shamator-Chessore indang lir, koba January 1, 2021 ya qualifying date ama Electors Rules, 1960 nung mela aliba ama renema liasü.

ERO Dimapur-i Draft Electoral Roll atema metetdaksür

Dimapur, Aenjeti/January 15 (TYO): 1-Dimapur-I, 2-Dimapur-II, 3-Dimapur-III, 4-Ghaspani-I & 5-Ghaspani-II Assembly Constituency tem atema Draft Electoral Roll indang list of amendment ya Electors Rules, 1960 nung aliba ama 01.02.2021 ya qualifying date süa renema lir,

ta Electoral Registration Officer Dimapur ajanga nüburtem dang sangdong ka nung metetdaksü. Iba Roll den külemi amendment indang list ya adoktsüogo aser ibaji office mapang pa indang office nung arua reprangtsü akok, ta sangdong ajangasa ashi.

AHOD & HOD senden thinener

Dimapur, Aenjeti/January 15 (TYO): Administrative Heads of Departments aser Heads of Departments indang senden January 19, 2021 nü nikongdang 1:00 ako nungi tenzükba

nung agitsü sentong sangdonga aliba thinena atar, ta sangdong ka ajanga ashi.

Iba senden atema anogo tasen mapangdong nung metetdaksütsü, ta Home Secretariat Conference Hall Department ajanga ashi.

Longleng DPDB senden nung COVID Vaccination drive indang jembibi

Dimapur, Aenjeti/January 15 (TYO): Deputy Commissioner, Longleng, M. Shayung Phom lenisüba kübok Longleng District Planning & Development Board senden January 15, 2021 nü Deputy Commissioner indang Conference Hall nung mena liasü.

Iba senden nung mendenpuba ajanga taoba senden nung lemtetba khen lepa reprangshi aser Republic Day anogomung atema mapa lema liasü aser District Hospital, Longleng nung January 16, 2021 nü COVID-19 vaccination sentong tenzüksüba indang senden nung adener nem metetdakja liasü.

Iba dak sendakba nung DPDB züngsem ajunga dang Medical department den yariteptsü aser social media nung olulu prokshiba nungi pila alitsü ayongzüka liasü.

Deputy Commissioner ajanga ketdangsürtem dang pei mapa inyakba tesem nung alitsü aser nüburtem nungdakba nung yariteptsü nenshia ashi. DPDB senden amenba mapang shidakba züngsem masü saka subordinate official temi shilem agiba ajanga telemtetba balala agiba nung tetsükdaksü ajurur, anungji DPDB aser district nung terenlok balala atema tongtipang senden amenba mapang danga meyoktsüla, ta pai ashi.

Dr. S. Imnameren Phom, DPO (RCH/UIP) Longleng

ajanga District hospital nung COVID-19 mozü agütsütsü atema renemshiba indang power point presentation agütsü.

Iba mozü ya jelia tenüng agüja alir nem mezüng agütsütsü, ya pai ashi. Mezüngbuba phase nung health care worker nem agütsütsü, iba sülen frontline worker, arishi küm 50 nungi tema aser tatemsa arishi küm 50 teküpok alirnem agütsütsü, ta pai metetdaksü.

COVID-19 mozü agütsüba mapang danga health care service akhi ama maneni alitsü, mozü agütsüba tesem nung social distancing yimya amshitsü, face mask agitsü aser teka shidoktsü tesem balaka yangluja alitsü, ta Dr. Meren-i ashi.

Vaccination room-i nisung ka dang aidaktsütsü melatsü aser mozü agirtem ya observation room nung minute 30 ayutsü, ta paisa ashi.

COVID-19 vaccination sentong tajungtiba nung agitsü atema Vaccination Officers aser Vaccinator Officer tem mapalem pai iba senden nung metetdaksü.

Kasa senden nungsa district telungzüik nung lenmang balala yanglushiba indang onüktem benoka jembibi aser tajungtiba nung mapa inyaksü atema department balala dang mita achayangtsü totuyuba agüja liasü.



Changtongya aser Longleng na tsüngda National Highway 2 lane yanglutsüba maparen nung lenmang tetenzüklen lenjem kanga mesademba agi lenjem tesademba aser lenmang tajungbalen pateta aotsü atema realignment agitsü shipet shiaka, Nagaland government aser NHIDCL purtemi mangaba agi parnok dang mepelaba sayua Hokolbar nü iba lenmang nung Akhoya lanurtemi, parnoki lenmang tajungba yangludaktsünüa akangba onüktem zülur, longkak aitba sentong nung shilem agiba noksa nung angur. Tamalena PWD (NH) Nagaland Chief Engineer office nungibito Akhoya yimten aser lanurtemi ashiba lenmang tasenbajiang tajungba asütsü ta state government dangi zülua lir. (January 15, 2021)



Assam Forest department ketdangsürtemi Biswanath district nung arem jang ka khasetba angur. Jangji Kaziranga national park nungi adokba liasü aser Matak o Kumalia nung nisung ana tepset aser asem yirutsü. (Biswanath, January 15)

PM Modi-i Assam semdangtsü atema BJP & AGP senden amen

Dibrugarh, January 15 (Agencies): Assam nung BJP aser AGP lennirtemi Dibrugarh nung Prime Minister Narendra Modi arutsü atema senden ka menogo.

PM Modi-i January 23 nü Sivasagar district kübok Jerenga Pathar semdangtsü sentong lir. Hokolbarnü Mancotta Road, Dibrugarh nung aliba Kiran Bhawan nung senden amen. Jerenga Pathar nung sentong agidang Prime Minister-i nisung lakh tema nem land pattas lema agütsütsü imlar.

Assam nung state assembly elections agitsü aliba atema BJP tongti lennirtemi state semdangtsü tenzükogo.

Tanü senden amendang CM Sarbananda Sonowal, agriculture minister Atul Bora, union minister for food processing Rameswar Teli, minister Naba Kr Doley, minister Jogen Mohan, minister Sanjay Kishan, MP Kamakhya Tassa, MP Pradan Baruah aser MP Tapan Gogoi nunger aden.

Upper Assam district kübok assembly constituencies 30 nungi BJP aser AGP MLA aser party tongti lennirtem senden nung aden.

PM Modi-i Sivasagar semdangtsü ta State BJP lennirtemi metetdaksüogo.

Sikkim nung police ajak dak 'drug test' agitsü

Gangtok, January 15 (Agencies): Sikkim Chief Minister PS Golay-i Director General of Sikkim Police (DGP) A Shankar Rao dang police ajak drug tests agitsü atema tetuyuba agütsüogo.

Sikkim Chief Minister PS Golay-i tuyuba ama Sikkim nung police ajak compulsory drug test agitsü aser iba nung putetertem mapa nungi anentsütsü.

"Sikkim nung police ajak compulsory drug test agitsü aser drugs achir putetra mapa nungi anentsütsü" ta Sikkim CM PS Golay-i metetdaksüogo.

Sikkim nung police aikati drugs achiba putetogo aser iba atema tendangtsü" ta paisa ashi.

"State sorkari police force tashitait aginür aser iba drug test ajanga parnoki drugs achiba nungi pilaa alitsü" ta Chief Minister-isa shisem.

PS Golay-i Sikkim ya drugs-free State ka kümdaktsünür aser iba atema police dena state sorkar mapa inyaker kari danga drugs achiba putetra merenshitsü ta metetdaksüogo.

"Police dang masü saka sorkar mapa inyaker kari danga drugs achiba putetra, compulsory retirement asütsü" ta PS Golay-i ashi.

Sikkim nung drugs timtiba apuba sülen police ajak dak compulsory drug test agitsü telemtetba agiogo. Iba ken o nung Assistant Sub-Inspector kati shilem agi ta tai tonglokja lir.

Mizoram nung Rs 3.52 crore alangba kozüjang apu

Aizawl, January 15 (Agencies): Mizoram kübok Champhai district nung Assam Rifles sepaitemi Hokolbarnü Rs 3.52 crore alang kozüjang puogo.

Kozüjangji Myanmar nungi Champhai district kübok miima bener aruba liasü ta godown ka mita aodang temolung melemi bilemer.

Assam Rifles jawans aser kozüjang enokba 2,100 bags ngutet.

Kozüjang ajakji customs ketdangsürtem telok kati



Meghalaya nung gaming nungi revenue angutsü atema Taxation department-i online gaming atema license agütsütsü telemtetba agiogo. Information & Technology amshiba ajanga tanü-asüng alima nung aser talisa Meghalaya nunga gaming ya kanga nüngtugu kümogo ta Minister-in-charge of Power, James Sangma-i metetdaksü. (Shillong, January 15)

Liton Nath pur aoba sülen tasü mang angu

Agartala, January 15 (Agencies): Police-i North Tripura district kübok Ranipara arem nungi Liton Nath indang mang ngutetogo.

November 27, 2021 nü Jayrampara tesem nung National Liberation Front of Tripura (NLFT) telungpurtemi Nath par kidang nungi pur ao.

Pa ya angoyoker ka liasü aser NLFT telungpurtemi par kibong dang nungi Rs 1.5 lakh meshi.

Nath pur aoba sülen anogo 45 süiaka police-i pa meküzmüktet.

NLFT telungpurtemi Nath pur aoba sülen tepset aser Ranipara arem nung rema yutsü ta police-i ashi.

Police-i pa indang tasü mang Panisagar sub-division kübok mozü ki ka nung post mortem asütsü atema bener ao.

Anogo ana tejaklen Takarjala tesem nung police-i NLFT züngsem pezü apuba sülen asüngdangya asü dang Nath indang tasü mang aremba osang angazük.

"Asüngdangya asü dang NLFT züngsemtemi Nath tepsetba aser pa mang aremba osang ashi" ta police ketdangsür kati ashi.

Nath-i pa kinungtsü aser tanur pezü toktsür ao.

Arunachal nung akshi noktanga agienogo

Itanagar, January 15 (Agencies): Arunachal Pradesh nung ak shi ayoktsü aser bener aruba noktanga aliba agienogo.

Veterinary department-i state nung ak ayokba aser tangalen nungi bener aruba kanga junga repranger.

Taoba ita asem tsüngda African Swine Fever (ASF) wara adokba osang mali ta department-i metetdaksü.

Department-isa tenokdangba agienba osang metetdaksü dang ak bener arur aser ak lepa ayokertem dang SOPs sülen anidaktsü nenshia metetdaksü.

Arunachal Pradesh aser Assam nung African Swine Fever (ASF) wara adokba sülen April 29, 2020 nü Arunachal Pradesh sorkari ak ayokba aser bener aruba noktanga liasü.



Assam kübok Tezpur nung health ketdangsür kati Serum Institute of India nungi anguba Covishield vaccine dose sayuba noksa nung angur. (Tezpur, January 15)

Rajdhani Express nung Rohingya nunger 10 apu

Guwahati, January 15 (Agencies): Agartala-New Delhi Rajdhani Express nung Railway Protection Force (RPF)-i Rohingya nunger nisung 10 puogo.

"New Delhi-i aoba Rajdhani Special train nung Bodbarnü tanur 5 aser tetsür ana dena Rohingya nunger 10 apu" ta NF Railway CPRO Subhanan Chanda-i ashi.

Railway security personnel-i West Bengal nung parnok ajak New Jalpaiguri station nung anizük.

Parnoki Rohingya nunger aser Tripura kübok Agartala station nungi train nung amen ta nangzük, ta Chanda-isa ashi.

"Parnoki January 10 nü Bangladesh kübok Comilla nungi Tripura-i aru aser agent ka teyari agia Agartala nungi train nung amen. Parnok ya Bangladesh kübok Cox's Bazar nung aliba Kutupalong refugee camp nungi aruba liasü" ta paisa metetdaksü.

Parnok ajak New Jalpaiguri nung aliba Government Railway Police (GRP) ket nung agütsü.

Parnok züngsema Northeast nung Rohingya nunger nisung 45 puogo.

Assam police, Railway Protection Force (RPF) aser GRP personnel-i tesüiba ita ana tsüngda Rohingya nunger nisung 35 puogo.

Bangladesh nung aliba refugee camps nungi Rohingya nungertemi ozüng alema India telungi arur.



TIR YIMYIM YIMOBILEM (EDITORIAL)

DIMAPUR KÜPTOKNÜ, AENJETI (JANUARY) 16, 2021

Nagaland tenüing menüker

Nagaland ta asüba tenüing ya tetetshitsü aser tangatsübo kanga tajung, kechiyong ibai English nungur lima ka tenügang mesük saka kodang bendangertem Nagaland tonga arua reprangdangdir, bilemba ama masü alima tereptsünga majung angur aser nisungtema jakla meindang aser ochimashiba purtem dang ajurur. Ibaji dang masü saka kodang asenok Nagaland adena tangaleni odir, tangar tsüngdang tejak metentetsüsa Nagaland nung government nung alirtem o nübortem na toktepa ochimashiba indang jembiba angashir. Aji tatem masü saka India tesem ajaklen Nagaland nung yangluba taila prangpong aser gari licence-tem putetba otsü angashidang, Nagaland nung yabo mapa shitak inyaka alirtembo mali ama bilemtsüsa alima dang asenok noksa tapu ka sayuadoker. Ano, iba denji Nagaland nung government aikati yimsü asüba aser telok aikati saru saruba otsübo tejembidak aser osang kaketem nung tadokdak lir. Iba amaji Nagaland yabo licence tiyazü yangludak aser tashiyim agi saru saruba lima amai kuma oa alidang, ano tang Delhi anasa Gurugram policetemi India tesem balala nungi jenjang tulu aketba gari tajung auyaa bener arua Nagaland nung ayoksang, Naga nungur ka apuba osang jagi Nagaland Khrista asoshi ta sangdongba lima nem tenüing menük tuluka bener arutsüogo. Atangji, taila licence yanglua ayokba aser tangar gari auyaa bener arua gari chasis aser engine number ajak melener ayokba mapatem nungji ayongayonga senotsü aika ajangzüksü. Ajisüaka, asen ayong-ayonga alibaji masü mesüra asen senotsü tajangzük tulu angubajia masü saka aseni inyakba mapa agi asena aser asen limaa meraketdaksür asü masü ta asüabajiang senso shia asoshi tongtibang asütsü. Shitakba agibo, Nagaland nungbo aser talisa Dimapur nungbo ki aser gari meshibang yutsür aoyonga kecha masü, shingaia mauyatsü aser bener maotsü ta jembitsüsa asenok ajak mulungsentsü kanga indanga alitsü tim. Ajisüaka, Nagaland nungbo Delhi nungi nübortem ajangzükdaksütsü bener aruba project kata takok mangur, sentong ajak nung senbo agima saka mapa inyakmongbo maka, sübokrem meteni file kata marakzür, ki jungjunga shibanga yutsür külena shisabolua senzür aser gari tajungbo anena yutsür talangi aotsüla masü, beneficiaries list nung nisungbo meyrirjang dak tali saka shitakba teyari angurbo mali, Delhi nungi mapa reprangi arur saka tesayutsü maka, shibaibo asenok dak temulung alemtsü ? Shibaibo Nagaland topur ajungba aser Naga nungur tongmelang aser ochishir ta tejak tentetenteta jembitettsü ? Ochimashi mapa inyakba agi takar akümtsü temela saka melamelaa takar akümba agi alima tsüngdang Nagaland tenüingmenüktsüra, ibajibo nisung aser Tsüngrem tsüngdang kenübo asen chirnur aser semchirsemnurtem tashi agi langzüksüsa akümtsü. Ajaki lenmang tatsübalen nungi dang takok nguner aser takar kümner, ajaki ozüing paidoker tajangzük tuluba angutsüsa inyaker saka ajakibo yamaji meinyaker, kechiyong parnoki pei lima topur raksa ajemer aser pei lima tenüing memenüktsüner. Itemji pei lima aser nübor meimertem lir. Shibaisa pei lima temeten aser terenlok asoshi jembir aser nokdaker saka pei lima tenüingmenüktsüsa auyar aser tashiyim mapa inyaker, parnokji pei lima temeten aser terenlok indang jembitsü malang aser metemsü. Asenokbo asen lima meimra, auyatsü agibo machimajemang aremdi, ochimashi mapa inyaksü agibo sensakang lidi aser tashiyim inyaka pei kibong mesütsü agibo sarasadema mapa tilateri asüyonga meranga inyakdi. Joko, Nagaland nungbo gari mauyar, gari aser prangpong licence taila meyanglur, tashiyim agi sarusachiba mali, mapa meinyak ser sen agizüka magir aser shingaia tangar tiyazü tenüing amshia sen magizüker ta asenoki masü alima ajaklen tangari asenok akümtsüba jembitsüsa asenok melenshidi aser asenoksasa asenok azüokdi.

OLEMSABANG

YIMDEN YANGLUSHIBA NUNG KHRISTAN SHILEM

~ Wati Longchar (Serampore)

(Yashi adok nungi...)

Yamaji arogo yimden aser alima yimden tajaba balala lir. Tali terajemba angatettsü asoshi yamai arogo aser yimden tepila metetdi:

Alima Yimden aser Mapa	Arogo Yimden aser Mapa
Political party balala tenteta yimsü asür	Political party mali. Tsüngremi jangja jangja ajatetba purtemi arogo nung tenzüker
Mapang tatazkük ka dang yimsü asür (Tatashim küm 5 tsüngda shia agir)	Tsüngrem yimli tatem maka.
Alima yimli country, state ta lemsar yimsü asür	Alima rangpen, meimchir rongnung telemsa mali
Temzüing yanglua nübur azüoka ayur	Laishibaji Temzüing tulutiba aser Lai tesayuba ajanga nüburtem yimjung nung ayutsü sayur
Nübur madak tashi amshir	Nübur temeim agi tenzüker
Ozüing lateta iba jagi azüoka ayutsü ozüing agütsür	Temeim ozüing tulutiba aser aji inyaksü ajungshir
Takok angutsü asoshi tashiyim aser sen amshir	Takok angutsü asoshi mapa meranga inyaker, ochi inyaker aser temeim sayur
Lokti terenlok asoshi mapa inyaker	Shi taküm aser tanela taküm teküzmük anaprong asoshi inyaker
Pei tajangzük bushia mapadong aser mapa aika inyaker	Khristar arogo, nütsüing aser alima meimchir rangpen tajangzük asoshi inyaker


Yimden yanglushiba nung Khristani shilem kar

Nisung ajak ya politician kaka ta ashitsü akok. Nia politician ka, saka political party ka nung züngsem masü aser iba party atema noktakba politician masü. Political party kecha nunga join mesüi inyakba politician ka. Anungji political party shibaisa ochimashi inyaker parnok anema jembir. Party shiba nübur rongnung telemsa mali, ochi nung mapa tajung inyaker parnokji junger ta nokdakba politican ka. Alima rangpen yanglushitsü, ochi inyaksü aser sensaker, meshimejunger ajemoka yutsüba, rarapangsen adokdaksüba, pei ajungtsü bilemba lenir tai tuteta ashir asü nungji pastor, arogo nung tenzüker ajak ya politician ta ashitsü akok. Anungji nübur ajaki Khristan ka ama yamai politics nung shilem agitsüla:

- Ochi nung tasü ita noktaktetba lenir aser lokti rangpen (Hindu dang mesüra shilu ka, kin ka, constituency ka ajungtsü atema dang masü) ajungtsü, renlok daksütsü nükla akaba lenir shimtsüla. Ibai Lai tesayuba lir ta angatetdi.
- India lima ama ka kong shilu balala, tamangba yimsü balala, oshi aika, sobaliba balala aika aliba lima ka nung government shibai nübur ajak küzmüka yuteter, akhümtsübuttsü sayur aser wazüka ayutsü sendong lir iba yimdenji shimtsüla. Secular party koda tongtibang, Temzüing wazüka ayutsü aser alima tejakleni odaksütsü asoshi ochi lenir koda tongtibang aji nübur nem angatetdaksütsüla.
- Lokti terenlok asoshi mapa agi inyakteta sayu nükla tejangja akaba Government shimtsüla.
- Ochimashi, tashi amshinüba, teyaksang, konang-naroküm arishiba lenir meshimtsüla.
- Nüburtem nungdak angatetba lenir, ochi nung amitba, nübur rongnung tebandang mali meimba; pei anisüngzük aser ajungtsü asoshi dang bilemba lenir masü, saka nübur nungdak tama abensadaksütsü ta aria bilemba lenir aser nübur ajongmesoa lokti temelenshi bener arutsür lenir shimtsü ajungshitsüla.

Gari gear neutral nung ayu nungbo maotsü, gear enok nung dang aotsü. Arogoi yimden latet nung ochi nung yamai südi ta shilem agitsüla, ainkar ola adoktsüla. Pei adianu, yimer asaa masü, ochi nung meyonngem agütsüba den, sabang balala nung, talisa pulpit nungi political education sayutsüla, talisa Khristan ka ama ochi nung noktaktettsüba tasü tait lenir shimtsü sayutsüla. Tejangrar, yimsüsütsü sempet aketer aser nübur meimer shirnoki lokti yanglushia tejakleni anitsü mulungteter parnoki tata menden asoshi tokteptsüla. Mosa Israel nüjiso asoshi noktakba lenir ka liasü (Anitet. 1:1-22), Amos ainkar ochimashi yimsüsür anema lokti yanglushitsü ajongmesor lenir ka liasü (Amos 5:21-25), Mosa aser Nathan ainkari ochi mashi yimsüsür anema apuso, kechiaser parnoki ochi meim, nüburtem meim aser sensaker, meshimejunger alaashia meyutsütsüla ta angatet. Yisu Khristai ochi mashi, sen meimer aser tashiyim yimsüsür anema noktak (Yohan 2:13-17), yongji pa kangki nung tepset. Tanü Nagaland nung ochi shir lenir nungdak aser arogoi tesayuba tejangja agütsütsüla. Gari anitsü asoshi driver tajung nungdak. Driver tamajungi, anira accident ajurutsü, gari nung mena alirtem yirutsü aser asütsü. Nagaland tejakleni anitsü asoshi driver tajung nungdak. Tetezü, tasü tait, ochishir, nübur meimba lenir shimtsüla. Ochishir nem Nagaland yimsüsüdaksüdi. Laishibai ochi yimsüsür shimang ta nungloktsübaji arogoi anir ataloktsü arung.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

OLONG PAITEP # 5695**TIPIEN**

2. Teka mapa tajung

- (8)

4. Anakshinüba

- (5)

5. Süoshi agi tazü

- (4)

9. Aria bilemtep

- (7)

11. Ajemalu ozü

- (4)

12. Tzü an

- (5)

13. Teben teloktep

- (8)

LANGTSÜNGLEN

1. Anepalua inyak

- (7)

2. Teptsü

- (4)

3. Nok agi raratep

- (6)

6. Kibong aküm

- (4)

7. Nüji masü

- (4)

8. Taruba küm


- (7)

9. Teka shidok

- (6)

10. Meputep/Mapet

- (4)

OLONG PAITEP # 5694 TELANGZÜBA**TIPIEN :**1. Yimlibilem, 4. Anak, 5. Tangar,
7. Aya, 8. Arong, 11. Par,
13. Lemjem, 14. Oagi, 15. Mulung.**LANGTSÜNGLEN :**1. Yongya, 2. Moko, 3. Marok,
5. Teronem, 6. Nung, 8. Amajok,
9. Jangzü, 10. belem, 12. Rong.**Noksa nung meputepi aliba 1 bushiang****TANÜBO NAI LANGZÜANG**

Q. _____ küm Indian Standards Institution (ISI) tenzük.

A.1948

B.1947

C.1946

D.1945

===== (Taruba adok nung onoki langzüksü)

YASHI ADOK TELANGZÜBA : 1981

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA?**JANUARY 16 NÜ ATALOKBA KAR:**

- 1756 - Britain aser Prussia nati 'Treaty of Westminster' sign asü.
 1809 - Peninsular War: Corunna tongbang rara nung British-i France madak takok angu.
 1819 - Alexander Gerard Philip, Baron van der Capellen ya Dutch East Indies indang Governor-General aküm.
 1908 - Pinnacles National Monument, California tenzük.
 1909 - Nimrod Expedition indang shilem ama British explorer David, Mawson aser Mackay nunger south magnetic pole tongtet.
 1920 - Paris nung League of Nations indang mezüng assembly amen.
 1936 - Spain nung socialist, communist aser anarchist longjemer Unidad Popular tenzük.
 1938 - Carnegie Hall (Benny Goodman) nung mezüngbuba jazz concert ayongzük.
 1947 - France indang Tir ama Vincent Auriol shim.
 1962 - James Bond indang mezüng film - "Dr No" tangok tenzük.
 1968 - Youth International Party ngutet.
 1976 - Peter Frampton-i platinum live album "Frampton Comes Alive" sayaa
 1981 - UK nung John Lennon indang single "Woman" sayaa.

SUDOKU # 5736

7	4	8	9	1	5	2	6	3
2	6	1	4	8	3	5	9	7
3	5	9	2	7	6	4	8	1
6	8	7	5	9	4	1	3	2
4	9	3	1	2	8	7	5	6
5	1	2	6	3	7	8	4	9
1	2	4	3	5	9	6	7	8
8	3	5	7	6	1	9	2	4
9	7	6	8	4	2	3	1	5

TELANGZÜBA # 5735**OJANG LUTEP # 5283**

SEANI	:					
TSOAKKÜ	:					
LEBMAI	:					
ÜITTSAA	:					
NTAOKK	:					
NDAG	:					
TCHAOI	:					
UTSASYÜ	:					
TNGELMUUI	:					
AMRRU	:					

OJANG LUTEP TELANGZÜBA # 5282

LOKTI NUNG KÜLEMI MEINYAK PEI MULUNGKA
 INYAKDANG AIBEN TIMTEM AJURUR

TAN HOPTA ATEMA - KOMA SÜLA ?

Q. Nagaland nung government mapa nung backward kintem atema reservation ayuba ya kin apia (tribe wise) masü saka kibong nun? senotsü ajangzüktetba apia (economic class) ayu nunga koma süla ?

Olong 20 shi nung January 15, 2021 tashi nung iba telangzüba ya onok dangi (e-mail - tiryimyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.

Sorkari aluyimer lenirtem den senden 9benbuba menogo



January 15, 2021 nü Vigyan Bhawan nung Union Minister temi aluyimertem lenirtem den senden 9benbuba amendang tanogokba noksa nung angur.

New Delhi, January 15 (Agencies): Linük nung aluyimertemi aluyimba ozüing tasen anema ita ka dak tema longkak aita aruba mapang Hokolbar nikongdang New Delhi nung Centre sorkari aluyimertem unions balala nungi lenirtem den senden 9benbuba menogo.

Vigyan Bhawan nung Union Agriculture Minister Narendra Singh Tomar, Railways, Commerce & Food Minister Piyush Goyal aser Minister of State for Commerce, Som Parkash nungeri aluyimer unions 40 nungi lenirtem den senden amen.

Punjab, Haryana aser Uttar

Pradesh densema state balala nungi aluyimertem meyrjang aika Delhi arrtsülen tesem balala nung adenshia ita ka dak tema longkak aita arudar.

Brihostibarnü Agriculture Minister, Tomar-i, "Aluyimer lenirtem den sadoksadoka ken o jembitsü atema sorkar renema lir," ta metetdakja liasü.

January 11, 2021 nü Supreme Court-i Centre sorkar dang, tetuyuba tasen ka magütsü tashi aluyimba dak sendakba ozüing tasen asempronglaji mebenoki atatsü oshidang agütsüba den iba ken o bentettsü atema nisung pezüi akümba luden ka tentetogo.

Brihostibarnü Bhartiya

Kisan Union Tir, Bhupinder Singh Mann-ibo Supreme Court-i tentetba committee nung züngsem asütsü memelung. Iba committee nung tanüngba züngsem asemji Shetkari Sanghatana (Maharashtra) Tir, Anil Ghanwat, International Food Policy Research Institute nungi Pramod Kumar Joshi aser Agriculture economist, Ashok Gulati nunger lir.

January 8 nü sorkar aser aluyimertem senden 8buba nung telemetba kecha magiteti liasü, kechiyong Centre sorkari ozüing asemji agentsü memelung aser aluyimertemia ozüing asemji agentsü takhangba agüja liasü.

Tetsür kibong akümtsü atema arrshi küm arlla 21 asütsüla: Task Force

New Delhi, January 15 (Agencies): Tetsürtem kibong akümtsü atema arrshi küm latettsü asoshi yaküm Narendra Modi-i aniba sorkari task force ka tenteta liasü, aser iba task force-i, tetsürtem taküm anema alitsü atema kibong akümtsü asoshi arrshi küm tajemtiba agi 18 aliba nungi 21 akümtsüla, ta benokogo.

Taoba mapang Samata Party tongti, Jaya Jaitly aser NITI Aayog züngsem (Health) V.K. Paul nati aniba task force-i tetsürtem kibong akümtsü atema küm arlla 21 asütsü atema benokba report ji Prime Minister's Office aser Ministry of Women and Child Development (WCD) nem taoba ita (December) agütsüogo.

"Iba report ajanga tetsürtem kibong akümtsü atema arlla küm 18 aliba nungi 21 akümtsü benoka lir, ajisüaka maparenshi shilem lemsar inyaktsü," ta sorkar ketdangser kati metetdaksü.

Yaküm Independence Day anogomong nung Ato kilonseri

tetsürtem kibong akümtsü atema arrshi küm arlla ya sorkari tanaben reprangshitsü nüngdak, ta jembia liasü.

Task force ya yaküm June ita nung tentet aser züngsemtemji health & family welfare, women & child development (WCD) nungi secretaries, higher education, school education & literacy ministries aser Legislative Department of the Ministry of Law & Justice nungi ketdangsertem densema lir.

Task Force nungsa Najma Akhtar (Vice-Chancellor of Jamia Millia Islamia), Vasudha Kamath, (taoba mapang SNTD Women's University, Mumbai nung vice chancellor) aser Gujarat nung gynaecologist, Dr Dipti Shah nungera züngsema lir.

Task Force-i ashiba agi, tetsür ka mezüing tanur asoba mapang nung la arrshiji küm 21 bosa asütsüla. Tera menor kibong akümba ajanga anema aliba tsütsü, rongsenkettsüing tsütsü aser loktiliba tsütsü tajangzük kanga lir, ta kasa report nung shia lir.

India-i kidanger linüktem nem Covid vaccine dose million 20 agütsütsü

New Delhi, January 15 (Agencies): India linüki kidanger linüktem nem coronavirus vaccine dose million 20 agütsütsü renema lir, ta osang ka ajanga metetdaksü.

India linük meyong company kati Serum Institute of India Ltd (SII) aser Bharat Biotech International Ltd na dang nungi vaccines alizüka Nepal, Bangladesh, Sri Lanka, Afghanistan, Seychelles aser Mauritius linüktem nem supply agütsütsü; supply karbo angati asütsü aser ibaji teyari agütsüba ama züngshitsü, ta kasa osang ajanga metetdaksü.

Taruba hopta ana tsüngda mezüingbuba shilem vaccines ji rong ajanga yoktsü. India sorkarisa

Latin America aser Africa nung aliba linüktem aser taoba mapang Soviet republics nung dena aliba linüktem nema coronavirus vaccine agütsütsü.

"Tanga linüktem nung vaccine supply agütsütsü atema osang tejangja agütsütsü atema tangbo kerar, kechiyong tang ang onoki asalentong yangludar," ta India foreign ministry otongdar, Anurag Srivastava-i metetdaksü.

January 16 nungi India nung vaccination tenzüksü atema linük meyong healthcare manufacturing company, HLL Lifecare Ltd-i Serum Institute of India aser Bharat Biotech na dang nungi vaccine vials alizüker, aser tanga linüktem dangi supply yoktsü maparen-a

parnok ajangasa inyaktsüa akok. Yaküm iba company-isa linük 120 dak tema dangi Hydroxychloroquine tablets yoka liasü.

Ato kilonser, Narendra Modi-i melungba sülen Brazil-i vaccine million 2 alizüksü atema tayimtsü ka India-i yoktsü, ta Brazil Health Minister, Eduardo Pazuello-ia metetdaksüogo.

Taoba ita Serum Institute chief executive officer, Adar Poonawalla-ibo, India-i March ita nungi dang tanga linüktem nem supply agütsütettsüa akok, ta jembia liasü.

Serum Institute-i AstraZeneca-i yangluba vaccine yanglur aser linük nunga Bharat Biotech-i covid vaccine yanglua agizükogo.

PM Modi-i aluyimertem longkak aitba agi laakdaksüner: Rahul Gandhi



January 15, 2021 nü New Delhi nung Congress lenirtem Rahul Gandhi aser Priyanka Gandhi Vadra na den party nung inyakerteri aluyimertem dak sendakba ozüing asem anema longkak aita Raj Niwas-i aoba noksa nung angur.

New Delhi, January 15 (Agencies): Linük nung longkak aitba aluyimertem pusema Hokolbarnü Congress lenir, Rahul Gandhi leniba nung Jantar Mantar nung longkak aitogo.

Rahul-i, Ato kilonser, Narendra Modi-i aluyimertem akhüm metsübur aser aluyimertem longkak aitba agi anibelemdaksüner, ta ashi.

Paisa, aluyimertem unions den aiben senden mena arubaji menodaksütsü atema sorkar sentong ka lir, ajisüaka aluyimertemi matsüngshitsü, anungji Modi-i aluyimba ozüingtem agentsüsa akümtsü, ta ashi.

Aluyimertem union balala nungi lenirtem aser sorkar na tsüngda senden 9 benbuba amenba anogo nung Rahul-i aluyimertemi longkak aitba pusema jembiba den külemi linük nung totzü jenjang kanga

atuba atema sorkar aitsü.

Aluyimertem temeden atema Hokolbarnü Congress party-i state aika nung Kisan Adhikar Divas anogomong ayongzüka mongogo.

Rahul Gandhi den AICC general secretary, Priyanka Gandhi Vadra, Delhi Congress lenirtem aser party nung inyakerteri Delhi LG'er kima nunga longkak aita liasü.

Pai, "Item ozüing ya aluyimertem yaritsü atema masü saka parnok takoksa ngudaksütsü atema lir. Item ozüing benokba nükjidong ya Ambani aser Adani nunger ama corporates yaritsü atema lir. Ibayongji onoki aluyimertem pusema nokdaker," ta metetdaksü.

"BJP sorkari item tanak ozüing agentsüsa akümtsü. Item ozüing magien tashi Congress party-i nokdaksü," ta paisa shisem.



January 15, 2021: January 16 nungi coronavirus vaccine agütsütsü lia January 15 nü Mirzapur nung Health department nungi ketdangsertemi coronavirus vaccine meshiteta külemküjaba noksa nung angur.

Indonesia menoknok lendong nung nisung 35 asü, aika yiru

Jakarta, Aenjeti/January 15 (Agencies): Hokulbarnü Indonesia indang Sulawesi asetkong nung menoknok tesashi ka anoka nisung tajemba agi 35 taküm sama aser ano noklang aika yirua ano ki-o-jen agi aika nembanga lir aser tsunami arutsü akok, ta ketdangsürtemi tekümdangtsü ashi.

Majene jila nungi kilometer 6 shi orr iba menoknok ya anepdang 1:30 ako (par mapang) meta ali telung nung kilometer 10 shi lur anoka taoksa nung nisung meyirijang aika ki yutsür tenemleni jena ao.

Iba menoknok aser aftershock temi nisung aliba ki 300 dak tema aser hotel ana raksatsü aser mozüki ka aser regional governor indang office ka laodaktsü, kong nisung aoka jana telung nung lir, ta ketdangsürtemi ashi.

Majene aser anasa aliba Mamuju district nung nisung 35 asü aser ano maneni asürtem ya alitsü akok, kechiaser rescue worker temi ki-o-jen laoa aliba yapoker, ta West Sulawesi nung disaster agency tekolakba, Darno Majid-i ashi.

Iba menoknok tesashi



Mamuju, West Sulawesi province künok Mamuju tesem nung menoknok tesashi anokba sülen Hokulbarnü nüburtemi ki raksar alidak nisung ali mali repringba noksa nung angur.

anokba ya ajanga anentsüh asemsü nung alu, electricity supply tem raksatsü aser Makassar yimti ama tongtipang yimtitem sendaktepba apu raksa.

Iba lendong atalokli national disaster mitigation agency ajanga osang ka agütsüba nung Majene nung nisung 637 yiru aser Mamuju nung nisung 20

shi yiru, ta shia liasü.

Tsunami arutsü osangbo magütsü saka Indonesia indang Meteorology and Geophysics Agency (BMKG) tekolakba Dwikorita Karnawatig-i osangbener senden ka nung aftershock arutsü akok, ta ashi aser ano menoknok tesashi anoka tsunami adokdaksütsü akok, ta

ashi.

Yangji aftershock ya 26 shi liasü aser Hokulbarnü iba menoknok manokdang Brehostibarnüa menoknok 5.9 magnitude anoka liasü, ta lai ashi.

Video tem nung yangji alirtem motorcycle nung mener temaleni atuba nguogo aser tetsür tanur ka jana agi nembanger lia nüburtemi teka agi jana indoka la agitettsü meranga liasü.

Video nung osang ka sangdongba nung Tir Joko Widodo-i asür kibong den asükhu lemsatep aser nüburtem dang süngjema alitsü ajungshi aser ketdangsürtemi

menoknok anokba tesem mita bushitsü, ta ashi.

Ketdangsürtem atema tongtipangtiba mapaji telecom service tanaben agütsütsü aser timtem ajurua alir nem süki, chiyongtsü aser mozü agütsütsü atema apu yanglutsüba ya lir, ta West Sulawesi provincial sorkar indang odongtar Safaruddin-i ashi.

Menoknok anokba sülen nisung 15,000 shi parnok talidak ki yutsür jena ogo aser coronavirus tashidak wara mechi teyari agütsüba nung timtem ajurutsü, ta disaster agency ajanga ashi.

"Ibai timtem tasaktiba alitsü aser onüki tsüba aliba rongnung iba lendong ya ka liasü," ta International Federation of Red Cross in Indonesia tekolakba, Jan Gelfand-i ashi.

Pacific Ring of Fire ta nungja agütsür alidak lir asünung, Indonesia nung mapang shia menoknok agi kongshir.

2018 küm menoknok 6.2-magnitude anoka iba sülen tsunami agi Sulawesi nung aliba Palu yimti nung kongshia nisung meyirijang aika takum sama.

2004 küm Boxing Day nung Sumatra north nung menoknok 9.1-magnitude anoka Indonesia, Sri Lanka, India, Thailand aser danga linük teku nung kongshia nisung 230,000 dak tema asü.

DR Congo anüdoklen civilian 40 dak tema tepset

Kinshasa, Aenjeti/January 15 (Agencies): Democratic Republic of the Congo anüdoklen yimtsüng ka nung sorkar anemba telok südi ta temolung melemtemi alirtemi amakba lendong nung civilian 46 asü, ta provincial ketdangsür kati Brehostibarnü ashi.

Iba lendong atalokba bushisüngdantsü atema Irumu territory nung aliba yimtsüngi sepaitem yokogo, ta provincial Interior Minister Adjio Gidi-i phone ajanga osangbener dang ashi.

"Nikongdang tashinung asür nisung 46 jangjateta lir," ta Gidi-i ashi.

Iba lendonga Allied

Democratic Forces (ADF) temi agütsüba lir, ta pai ashi.

Asürtem ajak ya pygmy ethnic telok nungi lir, ta yangji alir NGO lenir kati osangbener dang ashi.

Uganda nunger telungpur telok temi DRC anüdoklen azüdokshi mapa jenti inyaka 2019 küm tenzükba nungi tang tashinung civilian 1,000 dak timba tepsetogo, ta UN ajanga asadangteta lir.

Tang tesüsa azüdokshiba osang angazükba sülen sepaitem yimtsüngi ao aser yangji nisung tasümgang bendenba mapang lir, ta army odongtar Jules Ngongo-i ashi.

Uganda, Rawanda aser

Burundi den arra aliba DRC anüdoklen ya telungpur tekok 100 dak tema adenshia alir, aser parnok ya aika 2003 küm tembangba civil war nung anüngertem lir.

Deobarnüa mejangjaba telok kati DRC anüdoklen Virunga National Park nung ranger trok mita atar tepset, kong tesamar aliba mountain gorilla tem wazüka yua lir.

Taoba mapang ADF temi lendong agütsü südi, ta temolung melemtemi aliba maparen aika ISIL (ISIS) teloki tenüng agia lir saka telok ana tsüngta tesendaktep aliba indang UN nung mongintemi mejangjateter.



Englewood, New Jersey nung aliba Englewood Health nung police officer Jennifer Leeman COVID-19 mozü agiba noksa nung angur. Brehostibarnü first responder nem mezüng iba mozü ya agütsü aser mozü tali aruba mapang nisung timba nem iba mozü ya agütsütsü, aser iba mapang arishi küm 65 tain aser iba dang tainba nem mezüng agütsütsü.

Lendong ana atalok, Pakistan sepai pezü asü

Islamabad, Aenjeti/January 15 (Agencies): Brehostibarnü tesem ana nung lendong ataloka Pakistan sepau pezü takum sama, ta mitkartemi ashi.

Pakistan mitkartemi taittsüba sangdong ka nung India-i Dewa sector nung 2003 ceasefire agreement nung aibelena Line of Control nung sepai ka tepset, ta ashi. Iba Line of Control yagi India aser Pakistan tsüngta mangatetep aliba Kashmir region sadangtsür.

Pakistan sepaitemia meyiper injang khaloktsü, ta parnoki ashi.

New Delhi nungibo osang kecha sangdonga mali saka linük ana tsüngta teti Himalayan region nung amakba tai tongloktsüteper.

China-ia iba region nung shilem ka amokbanga lir, saka 1947 küm linük ana ya sadangtsüba sülen Himalayan region nungbo India aser Pakistan tsüngta ang rara ana tashi raraogo.

Ano külen Afghanistan den arrtsü anasa northwestern Khyber Pakhtunkhwa province

kübok North Waziristan district nung tsükchir atsüka aliba nung operation agidang khatepa sepai asem khaseta liasü.

Itdangiter temi operation agiba mapang Improvised Explosive Device mongin ka densema lendong agütsür ana tepset, ta army temi ashi.

Parnoki iba dak alaka osang tejangja kecha memetetdaksür aser asürtem ya kechi telok nungiar memetet.

2017 küm tashi North Waziristan ya yangji aliba aser bendanger tsükchirtem atema headquarter ka ama liasü, aser Tehreek-e-Taliban Pakistan (Pakistani Taliban mesüra TTP) samadaksütsü atema operation balala agiba mapang iba region nung telungpur samaogo, ta mitkartemi shia liasü.

TTP ua tangbo arrtsü nung amenoker Pakistan security forces aser civilian dak amaktsü renema lir, ta Islamabad-i ashir.

TTP ya Afghan Taliban nungi telok ka jakzüka aoba lir, saka arrtsü alema arua Pakistan telungpur telok den sendaktepa alir.

50th Wedding Anniversary



Mr. & Mrs. IMLITEMJEN LONGKUMER WAROMUNG (16th January 1971 - 16th January 2021)

Temiem ABA ASER OJA, nena kibong kümer küm 50 ajungba asoshi onoki Tsüngrem num tenüng sanga tsülur, tontibang süa nenai onok Tsüngrem o aser tesayuba tajung nung anitetba ajanga tang tashi onoki nena tang kanga pelar. Kibuba Tsüngremi Oja aser Aba (obala) maneni moajang ma.

Temiem chirnur, anük -apang aser semchirtem

GOVERNMENT OF NAGALAND DIRECTORATE OF YOUTH RESOURCES AND SPORTS NAGALAN: KOHIMA

NO DYRS-SPORTS-KISCE/13/2020

DATE, KOHIMA__JANAURY 2021

Advertisement

The Department of Youth Resources and Sports, Nagaland, Kohima invites interested Contractors and Suppliers for Supply of Sports and Science Equipment's for Khelo India Centre of Excellence Schemes (KISCE) centre at Indira Gandhi Stadium, Kohima.

1. Strength & Conditioning Equipment
2. Physiotherapy Equipment
3. Archery Equipment
4. Boxing Equipment
5. Wrestling Equipment

Details can be downloaded from www.nagalandtenders.gov.in

Issued by DIPR

Sd/-
(AKUMLA CHUBA)
Director

Kaketshirtemi meranga inyaktsüla: Minister Along

Noklak, Aenjeti/January 15, 2021 (TYO): Hokolbarnü (15.01.2021) Noklak yimdak Khiamniungan Students Union indang 58buba General Session nung alakteta tejaoker ama Minister, HE, TE & Tribal Affairs, Temjen Imna Along aruagi denogo, ta sangdong ka ajanga metetdaksü.

Iba sentong nung adener kaketshirtem dang, Minister Along-i, mapang tajung alangzüksü aser pei mangdang/ nükjidong ajangzüktettsü asoshi

meranga inyaktsüla ta ajungshi. Pai kaketshirtem dang pei wadang nung maneni meranga inyaktsü aser parnok tetsü-tebo mapang nungi benschia aruba sobaliba tajung nung anidaktsü aser senmang tajung yutsüba asoshi nümatanga bilemtsüla, ta ayongzü. Paisa Noklak nung alir nüburtem dang telongjem nung alitsü aser Nagaland nung tashiita aliba district ka akümtsü asoshi tetuyuba agütsü.

Advisor, Prison and Printing & Stationery, H.Haiying-ia

kaketshirtem dang pei nükjidong shitak ayutsü aser iba alizüng tongtettsü atema nendaka, ochishia aser meranga inyaktsü asoshi ajungshiogo.

Kasa sentong nung, Director General of Police (DGP) Border Affairs Nagaland, Rupin Sharma IPS, Deputy Commissioner of Noklak Reny Wilfred IAS, President Khiamniungan Tribal Council Thangou aser ENSF President, Sepili Sangtam nungeri jembiogo.

Naga Regiment indang 3rd Battalion nem award agütsü



Kohima, Aenjeti/January 15, 2021 (TYO): Hokolbarnü (15.01.2021) 73buba Army Day anogomung sentong nung, Naga Regiment indang 3rd Battalion nem Chief of the Army Staff Unit Citation award agütsü. 2020 küm linük tenzükbä maparen nung, ajak asoshi tatishitsü ka asütsüsa iba battalion ajanga inyakteta sayuba ajanga award ya agütsü,

ta PRO (Def) Kohima sangdong ka ajanga Lt Col Sumit K Sharma-i metetdaksü.

Iba Regiment nung 3 NAGA Battalion ya tasen alitsü, koba 2009 küm ang Ranikhet nung tenzü. Ranikhet ya Kumaon Hills len lir, kong Kumaon aser Naga Regiment na alir. Taküm Army Day nung Indian Army indang unit 23 nem iba tetushi award agütsüogo.

Iba Battalion tenzüker küm 11 tashi nung, lenla ajunga nung battalion yagi jenjang tajung ajangzüktetta aruogo. Tanü New Delhi nung Army Day Parade agiba mapang, iba Battalion tenüng nungi Colonel Bimlesh, SM & Subedar Major Senrun Elvenson Anal ajanga Chief of the Army Staff Unit Citation award ya agizüka liasü, ta kasa sangdong nung shia lir.

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

NO.DTE/MIN/IV/2013

Dated: Kohima, the 13th January, 2021.

NOTIFICATION

This is to inform all the Institute Nodal Officers (INO) of Colleges & Higher Secondary, who have enrolled in National Scholarship Portal to facilitate Post-Matric Scholarship and Merit-cum-Means Based Scholarship under Minority Scholarship Scheme to re-verify student's online scholarship application on or before 5th February 2021.

Futher, Institute Nodal Officers who have not yet verified their user login credentials are informed to download the Institute Nodal Officer form from the website www.dtenagaland.org.in and submit the filled form to the Minority Cell of this Directorate to generate login id and password.

Your's faithfully,

(ER. VIPULHOU LHOONGU)
Joint Director

Issued by DIPR

Advisor Mmhonlumo-i frontline workers dang Covid-19 mozü agitsü ajungshir

Bhandari, Aenjeti/January 15, 2021 (TYO): Nüburtem

küzmzüka yutsütsü nükjidong yur Bhandari sub division nung Covid-19 tesashi wara nokdangteta aser iba tashidak azüokba maparen achaayangtettsüsa, Civil Administration-i anir COVID-19 anema rarar aser Frontline workers den medical, police aser tanga department longjemer meranga inyakba atema, Advisor, IT, Science and Technology & NRE, Mmhonlumo Kikon-i parnok nem tenüngsang agütsüogo.

Brehostibarnü (14.01.2020) Bhandari yimtsüng nung Mmhonlumo-i süngküm tasen lapoktsüba mapang, pai item telok nem tenüngsang agütsü. LADF 2019-2020 kübok iba yimtsüng süngküm yanglua

liasü.

Iba maparen takok angutsüsa, lezmzüksüba senotsü ochishishia ketdangsüa amshiba atema yimertem dang pelaba metetdaksüba mapang, paisa, iba maparen ajanga tarutsü anogotem nunga yimtsüng nung terenlok maparen timba aser temoatsü alitsü asoshi teimla lemsatop.

Advisor Kikon-i, COVID-19 anema rarar aser Frontline workers dang tarendakba aser tsüba bilemba agientsü aser COVID-19 Vaccination atema maongka agitsü asoshi ajungshiogo.

Rev.Mhonimo Kikon-i iba süngküm meshiteta sarasademtsü. Iba sentong nung B. Longshi Odyuo menden liasü, ta sangdong ka ajanga metetdaksü.

Snapdragon 865 Chipset aketba OnePlus 9 Lite sayatsü

New Delhi, Aenjeti/January 15, 2021 (Agencies): March 2021 nung OnePlus 9 Lite den külemi OnePlus 9 aser 9 Pro sayatsü terenemba lir. Osang ajanga angazükba agi, Qualcomm Snapdragon 865 chipset aketba smartphone ya China aser India nung külemi sayatsü akok.

Taoba mapang, OnePlus indang device ya OnePlus 9E nüngja agütsür sayatsü ta metetdaksü, koba OnePlus smartphone flagship series nung variant tasembuba alitsü. Ajisüaka, China indang tech company ajanga iba dak sendakba nung osang tejangja ka magütsüi lir.

TechDroider sangdong ajanga angazükba agi, OnePlus 9 Lite nung model number LE2100 aser LE2101 ajener alitsü, koba OnePlus 9 model number (LE2110, LE2117, LE2119) aser OnePlus 9 Pro model number (LE2120, LE2127) den sendaktepa lir. Iba den külemi smartphone ya storage model ana nung angutsü.

Sangdong tanga ka ajanga angazükba agi, OnePlus 9 Lite smartphone ya vanilla OnePlus

9 aser OnePlus 8T na yongtsüda indang model ka alitsü. Smartphone tasenba nung 90Hz mesüra 120Hz AMOLED panel along den 65W fast charging feature angutsü. Tawa, OnePlus 9 series atema OnePlus-i Germany indang optics company Leica den sign asüyongjia, iba phone indang camera specification tem OnePlus 8T ama alitsü.

OnePlus 9 Lite jenjang \$600 (Sen 44,300) asütsü.

OnePlus 8T tesülen quad camera inokja lir. Phone inyakyim ya 4,500mAh battery aser Snapdragon 865 SoC ajanga nungittsü. India nung OnePlus 8T - 8GB + 128 GB storage option ya sen 42,999 nungi tenzüka yokdar.

Maneni, osang ajanga angazükba agi, OnePlus 9 aser 9 Pro nung Snapdragon 888 SoC angutsü. Kasa smartphone vanilla model nung triple rear camera setup aser Pro variant nung quad rear camera inoka yanglutsütsü imlar. Model anaprongla nung Android 11-based OxygenOS 11 out-of-the-box den flat display aser phone tejaklen hole-punch cutout angutsü akok.

Mulungnen O

"Ni rara tajungji raraogo,
Ni alizüing tonga asemogo,
Ni tamangji yuogo." - II Timoti 4:7



Ozüi temeimtiba Tsüngremlar Asür **IMLIMAR OZÜKUM** Tanelar wadang nung mesenseni nokdaka lia tia makai alishih temang nung tashitak agi meneper taneptsü bushia Tsüngrem dak teimla tulu yur bendang balala sema jajaogo. Pa shirang anogo nungi tenzüka akümüli wadang atemba anogo (10th January 2021) aser tang tashi lokti tentet, Arogo aser kija kibong shirnokisa sarasadem nüktzü, ali rongsen aser shisatsü agi onok dang meima yaria nungitdagi, nenok ajak dangi tsüngdong maratetnung iba zülü ajanga kangasa pelar-ani ta lemsateper. Tajung Tsüngremi nenok mapa tajung yari nenok nem meyipa moajang ta kinungertem ajaki sarasademtsür.

Meshi-i melitet nung teküboklen agüja aliba lokti aser kija kar dang alakteta pelaba lemsateper.

1. Mongsenyimti Baptist Arogo, Ministry Balala
2. ABAM Impur
3. Ao Arogotem
4. Mongsenyimti Rionsanger Putu
5. Aoli Sannüker Telongjem
6. Langpangkong Sannüker Telongjem
7. Langpangkong Tzükong Mungdang
8. Aoli Ozüküm Mungdang
9. Molungyimsen- Senso Mungdang, Kosasanger Putu, Baptist Arogo, Kaketshir, Ozüküm Kidong
10. Dimapur Molungyimsen Fellowship
11. Luyong Village Council
12. Yaongyimti Baptist Lashung, Yaongyimti Old Village Council
13. Mongtikang Village Council, Baptist Church
14. Mongsenyimti Compound Baptist Arogo
15. Mongsenyimti Senso Dr.J.R.Bailey Mission, Mongsenyimti Laishir Telongjem, Mongsenyimti Nokujungba Chir, Mongsenyimti Metsübu Kidong
16. Mongsenyimti Senso Telongjem Kohima, Tzüdikong, Tuli
17. Mongsenyimti Senso Tamang Telongjem Kohima, Mokokchung, Alichen, Changtongya
18. Clark Theological College, Aolijen
19. Clark Memorial Higher Secondary School, Impur
20. Mr. & Mrs. Tongpang Ozüküm, Hon'ble Minister, Kohima
21. Mr. & Mrs. Imnatiba MLA & Advisor, Kohima
22. Mr. Repaoba P.A. to Minister
23. Guwahati Ao Baptist Arogo
24. Ayursundra Superspecialty Hospital, Guwahati
25. Vertex Construction
26. Kobulong Indane Vitrak
27. Health Centre Management Committee, PHC Mongsenyimti
28. All Ward Union Chuchuyimlang Town
29. Mokokchung Town Nokujungba Lar

~ Temeim Kinungsü, Chirnurtem aser Kinungertem.

Nagaland team-i run 100 agi Sikkim kokogo



Dimapur, Aenjeti/January 15, 2021 (TYO): Plate Group atema Chennai nung tasayadak aliba Syed Mushtaq Ali T20 Tournament nung Nagaland team-i run 100 agi Sikkim team kokogo.

Iba asaya nung Sikkim-i toss koka parnoki mezüing fielding asütsü shim. Nagaland team-i over 20 nung run 174 yanglur parnok wicket pezü tashi out

süadok. Nagaland nungi Jonathan Rongsen-i run 56, SS Mundhe-i run 54, Stuart Binny-i run 30, Hokaito Zhimomi-i run 21 aser Chetan Bist-i run 13 yanglu. Sikkim nungi bowler Ajay-i wicket 3 aser Anureet Singh-i wicket 1 agi.

Asaya tanabuba shilem nung Sikkim pur over 14.2 nung run 76 dang yanglur asayar ajak out süadok. Sikkim atema Anureet

Singh-i run 41 aser Ashish Thapa-i run 9 yanglu. Nagaland nungi bowler Khrievitso Kense-i wicket asem 3 out sütsü. Kasa asaya nung Nagaland nungi Stuart Binny, Nagaho Chishi, SS Mundhe, Tahmeed aser Joshua nungeri wicket ka ka agi.

Deobar (17.01.2021) anügdang 12:00 ako meta Nagaland aser Mizoram team asayatsü.



Molungkimkong nung Supongmeren Memorial Volleyball trophy 2021 asayamong nung final Clark Memorial Club den asayaba nung takok angur Changtongya Volleyball Association-i takok ngur takok marok den asayartem agiba noksa ka yangi angur. (January 15,2021).

Hayden Walsh dak Covid-19 putet

Dhaka, Aenjeti/January 15, 2021 (Agencies): Leg spinner Hayden Walsh Junior dak Covid-19 tashidak aliba tejangja puteta aser iba jagi aruya aliba Bangladesh Tour indang one day series nungi agienadokba ajanga West Indies' squad nung timtem adokdaksüogo, ta ketdangsür sangdong ajanga metetdaksü.

Cricket West Indies-i ashiba agi, squad nungi arishi küm 25 tain Hayden ya mapang tatsüka shinga den majurutepdaksüi anepalutsü, saka tang tashi nungbo pa dak iba tashidak temaitsü agi shirangba mali.

"Taoba hopta tatemlen Bangladesh tonga aruli Hayden dak iba tashidak meputet aser Bodhbarnü Dhaka nung tanaben tendangba mapang, pa dak iba tashidak aliba tejangja putet," ta CWI sangdong ajanga metetdaksü.

"Tesüiba anogo 11 tsüingda pezüben tashi tendangba sülen, Hayden dak alaka squad nung tanüingba züingsem ajak tanaben

COVID-19 negative osang aru," ta sangdong nung shia lir.

Bangladesh aser West Indies tsüingda ODI series asem ya January 20, 2021 nü nungi tenzüksü.

Ajisüaka, iba ODI atema West Indies squad nungi skipper Jason Holder, Kieron Pollard, Darren Bravo, Sheldon Cottrell, Evin Lewis, Shai Hope, Shimron Hetmyer aser Nicholas Pooran nunger masayatsü.

Covid-19 wara dak sendakba nung tebilemtsü balala adokba ajanga item asayar yagi aruya aliba Bangladesh Tour nung shilem magitsü lemtet.

Coronavirus wara adoker külen nungi, Bangladesh nung nisung 500,000 dak tema iba tashidak putetogo, saka tanga linük apibo Bangladesh nung iba wara ajanga nisung ishika dang asü.

Walsh, shibai United States den international cricket career tenzü, pai West Indies atema ODIs 10 asayaogo.

Mexico nung CONCACAF Olympic qualifying ayongzüksü

Miami, Aenjeti/January 15, 2021 (Agencies): Taruba Tokyo Olympics atema CONCACAF men's qualifying asayamung ya March 18 nungi 30, 2021 tashi Guadalajara, Mexico nung ayongtsü, ta Brehostibarnü North o Central America aser Caribbean atema football indang tentet ajanga metetdaksü.

Mezüngbo iba qualifying asayamung ya 2020 March ita asayatsü renem, saka alima ajunga asüingba coronavirus tenokdangba ajanga asayamung thitsütsüsa aküm. Iba den külemi 2020 Tokyo Games-a 2021 tashi atsülangia liasü, koba renemba anogo melen küm ka tashi anogo atsülangtsür asayatsü.

Iba asayamung nung Under-23 team 8 agi shilem agitsü terenemba lir aser item team ya telok pezüzü tashi lemsatsüogo, koba Mexico aser Honduras na seeded team ana ama alitsü.

Group A nung Mexico, United States, Costa Rica aser Dominican Republic alitsü. Group B nung Honduras, Canada, El Salvador aser Haiti densema lir.

Team ajak ound-robin asayaba sülen, telok shia nungi mezüing aser tanabuba jenjang angur telok ana tashi semi-finals atema qualify asütsü.

Iba sülen, finalist team tem Tokyo Olympics nung shilem agitsü asoshi temsüa akümtsü.

CONCACAF men's qualifying asayamung atema Guadalajara nung Jalisco aser Akron Stadium anaprongla amshitsü. Iba den külemi shilem agir ajak iba wara nungi kümzüka yutsütsü nükjidong nung FIFA, Mexican Football Federation aser tanga stakeholder tem den longjemer health protocol tem yanglutsü asoshi asalentong yangluogo," ta CONCACAF-i metetdaksü.

BILEMDANGANG

"Alima nung pei pei wadang
inyakyim ajak lateta kar."